

03/10/1999

Malaysia pertikai tindakan Australia

LONDON: Malaysia tidak dapat menerima tindakan Australia yang berlagak seolah-olah mereka adalah timbalan sheriff Asia Timur dalam menangani pergolakan di Timor Timur.

Menyifatkan apa yang berlaku di sana sebagai satu tragedi, Datuk Seri Dr Mahathir Mohamad berkata, ia jelas menunjukkan negara itu ingin mengambil kesempatan memaksa Indonesia melepaskan Timor Timur.

"Kini Australia yang dulunya menyokong Indonesia untuk mengambil Timor Timur daripada Portugis, berubah hati sebab mereka nampak peluang untuk menjadikan wilayah Indonesia itu lebih rapat dengan mereka.

"Mereka sanggup menghantar 8,000 tentera dan membelanjakan banyak wang kerana menyifatkan tindakan itu sebagai satu pelaburan," katanya dalam sesi soal jawab dengan warga dan penuntut Malaysia, di sini, kelmarin.

Beliau berkata demikian ketika diminta mengulas mengenai pendirian Malaysia berhubung tindakan negara itu menghantar pasukan pengamannya di bawah panji-panji Pertubuhan Bangsa-Bangsa Bersatu (PBB) ke sana.

Sebelum ini, Perdana Menteri sudah membangkitkan rasa tidak puas hati Asean terhadap tindakan Australia itu kepada Setiausaha Agung PBB, Kofi Annan, ketika berada di New York, sebelum ini.

(END)